

四庫全書

子部

欽定四庫全書

竹譜卷八

元 李衍 撰

怪力亂神孔子所不語神道設教聖人亦不廢考之竹類蓋有變幻非常奇奇怪怪不可以理喻者故作神異品

神異品

化龍竹後漢費長房隨壺公入山以竹杖與騎至家長房以杖投葛陂中顧見化為龍

萊公竹宋寇萊公準貶於雷州死詔還葬洛陽過公安
縣民皆迎祭哭其喪斬竹挿地以掛紙錢焚之竹遂不
根而生尋復成林邦人神之號曰相公竹因立其廟奉
祀甚嚴劉貢父王樂道嘗為刻石以紀其事倦游錄所
載與此略同東軒筆錄云公赴雷州道出公安剪竹挿
於神祠之前而祝之曰準之心若有負朝廷此竹必不
生若不負朝廷此枯竹當再生其竹果生予謂萊公宋
賢相非罪而貶死百姓哀之喪還迎祭折竹懸紙忽爾

生成人以為忠貞之感故異而祠之如筆錄所載凡人之稍有知者亦必不為况萊公乎今不取李承之有詩

云已枯斷竹再成林

按三字原本缺今從別本補入

既歿賢公帝念深

按此句見別本作天為忠賢眷獨深

仆木偃耒如不起至今誰識大忠心

冬生竹宋朱道誠字信中幼喪父事母俞氏至孝俞多

病道誠截髮求醫俞卒葬於湘山景德寺之左結庵守

墳側忽冬生瑞竹以蓋其墳父老以狀聞於州州聞於

朝景祐四年有旨賜道誠絹十疋米一斛仍令本州存

恤

瑞竹生洛陽司馬溫公獨樂園中竹一本去地二尺分
為二幹並生六節節間容線復合為一



無骨箬出餘杭洞霄宮漢武帝元封三年創宮壇於大
滌洞前為投龍祈福之所唐高宗時遷於前谷為天柱
觀光化二年錢王更建大中祥符五年賜洞霄宮額峰
之下多生紺箬昔許先生邁將上昇語弟子曰吾有金
丹藏無骨箬下他日有緣者遇耳樵人間有得箬者及
尋採則不復見

掃階竹唐僧全真姓周氏郴縣人元和中居湘源之覆
釜山修道山頂極高處寂後生掃階竹高不過五七尺

枝葉繁密柔軟芬芳游山之人折去留數月葉不脫落
特異於常竹

神翁竹神翁姓徐名守素宋宣和間在泰州萬壽觀備
灑掃之役常持竹簾游市肆間言人吉凶頗驗死後墓
園竹出每竿節間芄芄生細枝無數惟一根窠束之即
成掃帚相傳為神翁之簾為種而生或言懸於室中能
辟塵然常試之無驗今泰州城內外亦或產此土人以
充方物饋送



墨竹傳給事崧卿題越州戒珠寺竹堂詩有云色帶墨
痕迷舊沼響隨鐘韻下層樓注云山中有墨竹下有墨
池父老相傳皆云逸少遺迹今寺在戢山即王右軍故
宅雖有墨池而堂已廢墨竹亦未之見也

墨點竹生茅山墨池上葉生黑斑或一二點或三五點
如灑墨之狀池石亦然

岐竹生慶元曾丰所居出土纔一節別為霜暈連旋而
上者四復為節者三圍為寸者九蓋一苞也忽岐為二

長苞成竹曾自作銘

點砂竹生大聖關南山中竹細如七筋高不過五六尺
葉大而踈上有朱砂細點如麻豆許彼人云杜天師書
符筆灑之遂有此種



星竹生太平當塗縣青山李太白塚上枝幹一如常竹
但葉上有細黃白點狀如天星說者謂太白長庚之精
故墓上之竹如此之狀與點砂竹無異但其點止黃白
二色無朱紅色者

淚竹生全湘九疑山中博物志云舜南巡狩不返葬於
蒼梧之野堯二女娥皇女英追之不及至洞庭之山淚
下染竹成斑妃死為湘水神述異記云舜南巡葬於蒼
梧堯二女娥皇女英淚下沾竹文悉為之斑亦名湘妃

竹

巖音豁公竹生福州雪峰山中別山上人說云五代巖頭

禪師名巖一日來訪雪峰義存禪師憫其山中無菜而此竹散生多筍其味又美特為栽之迄今連延百十里間皆此種大者過三寸圍枝葉與江南竹不異其節長勻可作簫笛俗音訛為發竹

蟲竹生七閩山中叢生如蘆每節生一蟲如新蟬之未翼者外無竅隙隨竹而生竹將老乃穴其旁而出今發

州東陽山中亦有之

魚尾竹西蜀邛州西十里許白鶴山白鶴觀古昔仙人
四目老翁得道之所其山生細竹葉上每一梢末有細
籜左右相對一二寸許二籜亦對生如魚尾狀視之宛
如細魚人傳四目老翁釣魚其下折竹貫之遂成此種
又名穿魚竹



筋竹永嘉郡記云陽嶼去安固江口六十五里有仙石
山頂上有平石壁方丈餘名為仙壇壇陬有一筋竹凡
有風來動音自成宮商又東陽劉道先元嘉四年筋竹
林忽生連理野人無知謂為禍祟斫殺之

長生竹出南嶽後洞高尺許和根取而枯之經久見水
復生

香竹生洞庭君山一名洞庭君主竹高五六尺遇風雨
則清香襲人靜夜或聞陣香如水腦之臭移過湖則槁

夜合竹出涪陵高二三尺日間葉開夜則卷如針

桃竹涪陵相思崖生此竹昔有童子在崖下吹竹神女
悅之投以桃竹釵童子報之以簾今桃枝與竹皆生崖
畔即梓潼使君章彞贈杜工部雙杖者杜詩云江心磻
石生桃竹蒼波噴浸尺度足新根削皮如紫玉

孤竹襄陽薤山下有孤竹三年而生一筍及成竹母已
死矣代謝如春秋焉任昉述異記云東海畔孤竹生焉
斬而復生中為管周武王時孤竹人獻筍一株文選笙

賦云有汶陽之孤篠竹譜汶篠生筍欲存其母即折之如筍成竹即母竹枯死

龍牙竹出永嘉大羅山其竹長四五尺稀節人取必有大風雨雷電之異人下山即止二月筍


月竹叢生狀輕短每月抽筍故謂之月竹筍如箭竹不堪食宋景文公讚曰茲筍可嘉歲十二萌

三稜竹狀若櫟櫟葉莖柄若三脊然筍初抽川中人家竹林中忽有之吉兆也

符竹廣中惠州羅浮山中生葉長七八寸闊一寸許每一葉上有白道如蟲行迹屈曲如篆文土人云昔天師為雨暘愆期嘗臨海岸作法書符於竹間故有此種今茅山亦有此種云是三茅君書符於此故生



篆文竹夷陵志云出遠安縣清溪寺之仙居洞狀似箭
竹葉上多蟲篆文如古籀俗云鬼谷子遺迹也與符竹
相似而大小差異瀘州安樂山有天符葉類荔枝葉而
長上亦有篆文



尋竹山海經云禹湮洪水殺共工臣相繇其血腥臭不可生穀其地多水不可居也禹湮之三仞三沮乃以為池羣帝是因以為臺在崑崙之北有岳之山尋竹生焉注云尋大竹名戴凱之譜云相繇既戮厥土惟腥三沮斯沮尋竹乃生

按尋竹已見異形
品下卷此處複見

射的竹小竹也輕直勁利世罕逢之仙人取為箭會稽記曰射的山南有白鶴山漢太尉鄭宏常採薪得一箭奇之頃有白鶴神至取箭問何所欲宏曰常患若耶溪

載薪為難願旦南風暮北風後果然

不死竹齊民要術云外國圖云高陽氏有夫婦相抱而
死神鳥以不死竹覆之七年男女皆活注云不死人國
在海極東其人不死居圓邱上有不死竹木亦猶楚辭
所謂木蘭宿莽之不死也

雲夢竹甘澤謠云許雲封言雲夢之南鑒在柯亭之下
其竹可為笛以今年七月望前生明年七月望前伐過
期不伐則其音塞未期而伐則其音浮初秋生筍

鸞竹生開封之進德里昔孔希葵縱雙鸞其上後鸞去而孔亦歸真每疾風起竹常作鸞鳴

連理竹梁天監起居注曰十六年連理竹生異苑曰東陽劉道先觴竹林忽有連理

木竹唐萬敬儒父母亡廬墓五年嘗挿柳枝於墓左倏變為竹木心竹表今尚有之在廬州合肥縣西北三十里公成鄉西公村


爆竹出袁州仰山爆竹巖節踈鬆脆除夕人家率取然

之爆響異於他竹

駢筍永州學正劉學海名洄洙云昔居眉山淳祐乙巳
家園忽產駢筍識者以為祥未幾其父果登甲辰進士
第

石筍宋政和間延州永寧開大河岸崩入地數十尺下
得筍一林凡數百莖根幹相連悉化為石沈存中云延
郡素無竹此竹乃在數十尺土下不知其何代物無乃
曠古以前地氣卑濕而宜竹耶

石竹未詳所出近李容齋總管至宣城與江東廉訪丁
太初廬踈齋訪黿峰宮錄嵇秋山當軒石上盛栽菖蒲
其間乃有二竹並生高二尺許枝葉下垂視之石也云
得之山中背陰處附見於此以廣異聞



欽定四庫全書

子部
竹譜卷九

詳校官中書臣孫溶

編修臣程嘉謨覆勘

謄錄監生臣章儔

繪圖謄錄監生臣陳一章

欽定四庫全書

竹譜卷九

元 李衍 撰

古人有云物多相類而非幽莠之幼也似禾驪牛之黃也似虎白骨疑象砮砮類玉此皆似而非者也孔子曰惡莠恐其亂苗惡鄉原恐其亂德惡似而非者今夫微草賤木萑葦之屬本無剛勁之姿歲寒之操以其乘山澤之氣分雨露之滋對月臨風婆娑弄影望之似是夷考即非此竹之鄉原也故作似是而非竹品

似是而非竹品

筍草出湖州田野間叢生亦有擗葉一如竹筍漸長成竿高三五尺亦如竹但無枝葉至秋乃死莊子所謂不筍者是也江淮之間亦有之




水蔗閩廣之間皆有之生田野間或水邊節莖微紅紫色葉青青望之宛如真竹諦視則葉薄如草其莖節咀嚼微甘村童嗜之故有蔗名




蘆蔗生靜江上下水邊七閩之間亦有之一如水蔗但節間無紅紫色高丈許


大蘆生安南水許枝強葉大望之如簾竹筍亦似之可食



水荻生安南邱溫縣及婆律水邊叢生莖細葉大一如
簾竹




蚤藤生廣西安南山間樹木上盤糾曲曲有節有葉如
竹安南人呼為金苓




馬耳草在處有之大者高二尺許小者高五七寸好生
下濕處亭亭如竹葉尤似之初出土時葉如馬耳狀故

名



竹頭草在處有之枝如莠葉長五六寸寬一寸許有細
勒道望之如簾竹叢叢秋生白花如菰蔣狀或云無竹
處卒欲煮藥取此葉以代之其性與澹竹同今東陽酒
匠直呼此為澹竹葉每歲夏伏采之



青環兒花江淮之間處處有之初遍地鋪生一節一葉
一花其葉如竹其花青碧色兩瓣中有白鬚至秋壯時
亦能堅立醫家用為通水道藥本草名鴨跖草野人呼
為碧竹子又名碧蟾蜍



竹葉草喜生卑濕處在在有之節莖脆嫩葉如真竹春
時初出採者可為菜食之夏秋之交節間開碧花或云
此即碧環兒花非也二種大同小異耳

牛頭旃檀香木也出西域末利山中觀佛三昧海經云
旃檀生伊蘭叢中未及長大在地下時芽莖枝葉如閻
浮提竹筍仲秋月滿卒從地生成旃檀樹衆人皆聞牛
頭旃檀上妙之香

茈胡生宏農山谷及冤句今關陝江湖間近道亦皆有

之二月生苗甚香莖紫青色有節葉似竹稍堅七月開黃花

龍膽草生齊胸山谷今近道亦有之根類牛膝直上生苗高尺餘四月生葉莖細如小竹枝七月開花如牽牛迎涼草未詳所產處頗類碧草而幹似苦竹葉細如杉雖枯槁而未嘗凋落盛暑掛之窓戶間則涼自生杜陽雜編李輔國夏則於堂中設迎涼草

生薑苗出武陽縣今江淮之間處處有之人家趁春時

種宜沙白地初出土時宛如竹筍葉亦似之其根滋生甚多至於秋社收之每窠有得一觔者

牡荊生不過三兩莖多不能圓或匾或多似竹節

茵桂無骨而圓如竹

靈壽木漢孔光傳顏師古注曰靈壽木似竹而有節晉安海物記曰靈壽木其節竹又曰木竹中實注云漢賜三老靈壽杖即此竹靈壽即木竹異名耶

羊奚林廬齋莊子曰義羊奚草名也草之似竹而不生

筍者曰不筍凡竹筍則可食此不可食也

案此引不筍與前筍草複

莢委萎爾雅云藥草也葉似竹大者如箭竿有節葉狹而長表白裏青根大如指長一二尺可啖按集韻莢草名萎藥草或作莢上聲

蘭

餘覽切

草玉篇云葉似竹生水

竹葉茶毛文錫茶譜云容州黃家洞有竹葉茶如嫩竹茶極甘美

料藤異物志曰料藤圍數寸重於竹可為杖箴以縛船

及以為席勝竹也顧微廣州記曰料如枅櫚葉踈外皮
青多棘刺高五六丈者如五六寸竹小者如筆管竹破
其外青皮得白心即料藤

欽定四庫全書

竹譜卷十

元 李衍 撰

竹之比德於君子者蓋稟天地之和全堅貞之操虛心勁節歲寒不變是宜昔人特號以此君而不敢與凡草木例名之也彼椶櫚瞿麥之屬亦何足筭盜名欺世眩惑愚瞽譬夫小人之儒深情厚貌荒唐詭譎偶爾假譽一時妄自披襟擬古賢哲若不精辨名實深攷行能遽因左右之稱輒加衆庶之上兩端既竭五枝易窮而方

冀立長治之基成久安之業殆猶乞甘雨於土龍欲馳千里而乘海馬豈惟不勝其任而已故作有名而非竹品


有名而非竹品

檉櫚竹兩浙兩廣安南七閩皆有之高七八尺葉是檉櫚而尖小如竹葉自地而生每一葉脫落即成一節膚色青青一如竹枝十道志曰巴蜀紙惟十色竹則九種檉竹其一檉身而竹葉宋景文公益部方物贊曰葉檉

身竹族生不蔓有皮無枝實中而榦注云叢生葉似椶
有刺陸務觀有占城椶竹拄杖詩



石竹京都人家好種之階砌傍叢生葉如竹莖細亦有
節暮春花開枝杪或白或紅或粉紅色或有紅紫暈或
重葉多葉不等惟深朱殷色者最為難得花盡有子成
房刈去再生至秋又生仍如春盛亦有野生者今處處
有之一名瞿麥



石松竹出陽朔幹似松高二尺春筍如蕨菜味極辣

篇竹南北在處下濕地俱有之布地而生莖綠紫有節

葉似竹醫家用為利水道藥廣西安南者葉大可煮為

菜韓詩作菴蒿徒沐切又爾雅釋草竹篇蓄䟽曰孫炎引

詩衛風曰綠竹猗猗郭云似小藜赤莖節好生道旁可

食又殺蟲按陶隱居本草注云節間白花葉細綠人謂

之篇竹煮汁與小兒飲療虺蟲又爾雅翼云蜀本圖經

云葉如竹莖有節細如釵股生下濕地其微似竹則

宜謂之竹爾

菴竹又名菴蓐又名王芻毛詩疏引草木疏云草似竹
高五六尺生淇水側人謂之菴竹爾雅釋草菴王芻疏
曰舍人云菴一名王芻某氏云菴鹿蓐也郭云菴蓐也
今呼鴟脚莎詩衛風云瞻彼淇澳綠竹猗猗是也洪氏
隨筆云毛公解衛詩分綠竹為二物諸說皆北方不見
竹之語耳熙寧初吳安度試舍人院有司以所賦綠竹
詩背王芻古說而直以為竹遂黜不取富韓公為相言

史記叙載淇園之竹正衛產也安度語有據遂賜進士
出身爾雅翼本草名葦草俗亦呼澹竹葉所謂終朝采
綠者按諸說或以為草或以為二物或又直言竹而已
姑並存之


翦竹生江浙廣右永湘間甚多枝間有節其葉似桃其
花如石竹差大丹紅一色人家亦有盆檻內種者俗名
翦春羅




觀音竹生南嶽熊湘山中衡州花藥山報恩寺方丈後
有一叢數莖如水中草狀高五七尺其葉尖細有三勒
道大者有五勒道春暮葉下開花紅紫色亦結實其莖
無節有小籜浙東溫處人家亦有之



水竹生河間將陵今處處有之人家種者其莖圓直根如紫河車葉如冬青草每相去二寸許周圍生五葉高三五尺無花不實至冬即死明年筍出如初本草陳藏器餘云水竹葉如竹葉而短小生水中能去風人取其葉生食之是又別種與此不同



千歲竹生安南七閩兩廣初生從地如牛蕨狀放開時
葉葉對生一枝長三五尺每年漸生多近下枝葉漸退
數十年木身方尺許長其形臃腫似椶櫚歲飢人煮食
之可療飢



椒竹生七閩兩廣浙東山野間人家庭院亦有植之者其狀一如千歲竹每葉可高五六尺但根不出土無木身葉間有刺如椒木上者故名志書云成臯諸山間有竹葉椒陸璣云樹似茱萸有針刺葉堅而滑蜀人作茶吳人作茗未詳與此異同

莠竹喜生池塘及路傍莖細節高近下曲屈狀若狗脚南土多茅少草馬見此物必欲食之

藍田竹在處有之人家喜栽花圃中木身上生小枝葉

葉相對而頗類竹春花穗生色白微紅結子如豌豆正
碧色至冬色漸變如紅豆顆圓正可愛臘後始凋世傳
以為子碧如玉取藍田種玉之義故名或云此本自南
天竺國來目為南天竺人訛為藍田竹人取此木置鳥
籠中作架最宜禽鳥本草注謂之青精




玉竹生滁州淮西等處山谷及邱陵俱有之一名地節
一名馬薰葉似竹大者如箭幹有節葉狹而長表白裏
青根可食或云即歲蕤也

錦竹江淮近水平地多有之本草云似竹而斑花梅聖
俞錦竹詩云雖作湘竹紋還非楚筠質化龍徒有期待
鳳曾無實本與凡草俱偶親君子室又注云草也

桃竹廣西靜江府城外千峯觀前有桃一本其葉絕類
竹但不勁利搗之可以橫斷他處未之見也


鹿竹一名菟竹處處有之高不過一尺二三寸二月始
生一枝多葉葉狀如竹而短根如荻及菖蒲概節而平
直或云即黃精之別種




木竹生安南婆律山中木身簾漣成樹上生枝有節綠色如竹葉如胡桃嶺外代答云木竹子皮色形狀全似大枇杷肉甘微爛核亦似枇杷秋冬間實半青黃時採實收藏至三四月不壞江廣間一種竿如紫藤根下臃腫楮拙亦名木竹取為杖忌箠馬能傷馬骨也

懸竹生福建山中崖陰叢生傍垂細根數尺下著土其端輒茁根苗類虎耳草好事者翦取用脉線懸簷間借風露而活每至夏半生花色淡黃形如鳳兒花一枝多

至五六花春時抽筍夏乃成竿秋尤盛其葉不凋培養可五六年或云即金釵石斛亦名長生竹石斛產春州即今南恩是也括蒼山中亦產此其俗固謂長生竹云



久竹生淮北下濕處成叢每枝生三葉如竹雖大旱亦
不枯林氏注莊子云筍可食



夾竹桃自南方來名拘那夷又云拘拏兒花紅類桃其
葉畧似竹而不勁足供盆檻之玩

茅筍諸集拾遺云嶺南山谷茅地中叢生筍甚大籜皆
竹根皆茅人食之名聖筍

赤箭天麻也以其莖似箭幹而色赤故名

